

## Teachtaire díleas ag Dia

[McKenna, L.: *Dán Dé: The poems of Donnchadh Mór Ó Dálaigh, and the religious poems in the duanaire of the Yellow Book of Lecan*, Dublin, 1922, poem 14]

Tadhg Ó hUiginn .cc.

1 Teachtaire díleas ag Dia  
re breith sgéal go Mac Mairia  
Mac Dé do chongnamh le cách  
comhghar é agus a óglach.

2 An neach bhus sia aga ón éag  
d'fhuil Ádhaimh anba an coimhéad  
's an té bhus urlamh oidhidh  
comhghar é dá n-ionsoighidh.

3 Do fheadar gidh iomdha dhóibh  
ag ais dreachadh 'n-a onóir  
cia dhíobh as neartmhaire ar nimh  
teachtaire Ríogh an ríchidh.

4 Aingeal re haghaidh smachta  
dá dtug Chríosd a chomhachta  
ós chionn na n-uile aingeal  
don chuire fhionn árchaingean.

5 Gabhadh re ais ard an chuing  
gach neach dá aosdacht aguinn  
gabhadh gach aon dá óige  
maor tabhaigh na Tríonóide.

6 Béaraidh Míchéal aingeal inn  
ó eisinill go hinill  
cara na héigne is é an lán  
is mé an t-éigne ar an éadtrágh.

7 Agra nach éidir do cheilt  
chuirfeas m'anmain san imeirt  
ag lucht fhormaid Dé im dheaghaidh  
toghmaid é mar fhéicheamhain.

8 Biaidh a dtiocfa ar an dtalamh  
ag Míchéal 'gá meadhaghadh  
go dtí an imirche a-tá thall  
lá innithe na n-anam.

9 Gairfidh Íosa uair nó dó

as an talmhain a dteasdó  
nach bí do mheas is na mairbh  
go rí leas an treas toghairm.

10 Tús an laoi bearar an bhreath  
ar a chloinn ag Dia dúileach  
tearc foirne clár na cruinne  
acht dál coinnmhe chuguinne.

11 Dá rabh a Rí na glóire  
m'olc ní hadhbhar míodhóighe  
do mhaor ar chionn na coinnmhe  
liom is a chaor connailbhe.

12 Is é as uachtaráin orra  
is breath do bhreith eatorra  
ar chuir a-nuasain do nimh  
is a bhfuil uasaibh d'ainglibh.

13 Míchéal aingeal is é thug  
ar an lucht do leag formad  
teacht fa mhúith a muigh neamhdha  
do mhuin tnúith ré a Thighearna.

14 Do ionnarbh ar aontuigh cion  
do roighníbh an uird aingeal  
a-tá a ordail 'n-a n-easbhaidh  
ar ordaigh an t-ingeal-sain.

15 Ar éis an chatha do chuir  
mar do ordugh an t-Athair  
cairt ar teagh nDé do dhaingnigh  
's ar lean é dá archainglibh.

16 Fuaradar an t-ord aingeal  
ón Athair ón árchaingeal  
cairt a sídh ó soin i le  
acht a bhfoil díbh i ndaoirse.

17 Bíom aga 'n-ar n-aos grádha  
ceannham cait a shíothchána  
gidh bé lá cheanngar an chairt  
earlamh a-tá dá tabhairt.

18 Sealbh m'anma deonuighim dhuid  
re teachtaire nDé a-déarmuid  
gabh mar dholadh 'n-a dheaghaidh  
loghadh dhamh ón Dúileamhain.

19 Ná cuir mo mhaith is an meidh  
más éigin m'olc 'n-a aighidh  
ní cead tusa dá thomhas  
beag nach usa an t-amharas.

20 Gan bheith teann i dtígh nimhe  
do bheith agam d'áirimhe  
ní bhiú dá mbeis-se ar mo sgéal  
gion gur fiú meise a Mhíchéal.

21 Bheith i n-a thígh go dtuilear  
dom anmain ón árchaingeal  
gidh bé 'gá mbeath a aithne  
teach mar é budh ionsaighthe.

22 Beatha a aingeal is sí so  
Mac Dé ag aoibhneaghadh orra  
's an líon a-tá-san is tigh  
ag sásadh Ríogh an ríchidh.

23 'N-a thimcheall i dtígh nimhe  
labhraid éanlaith ainglidhe  
is é as fhoghar dá gach eon  
moladh Dé moladh Mícheol.

24 Mairg nach tuig ar an ngréin ngil  
deallradh aighthe gach aingil  
mairg an uair do chluintir ceol  
nach smuain ar mhuinnitir Mícheol.

25 An taithneamh a-tá ar gach ndeilbh  
do shoillseochadh uaimh Ifeirnn  
cia dán tualaing a thuigsin  
tuaraim do Dha an deallraidhsin

26 An teachtaire thig do nimh  
le haitheasgaibh Dé dhúiligh  
go gcuire ionn i n-aointeach  
's an cuire fionn forbhaoilteach.